

**REGULAMENTO DE  
PARTICIPACIÓN EN  
COMPETICIÓN  
DEPORTIVAS EXTERNAS**

## INDICE

**CAPITULO 1: ÁMBITO DE APLICACIÓN**

**CAPÍTULO 2: PARTICIPACIÓN NAS COMPETICIÓN DEPORTIVAS EXTERNAS**

**CAPÍTULO 3: COMPROMISOS DA ÁREA DE DEPORTES**

**CAPÍTULO 4: OBRIGAS DAS PERSOAS PARTICIPANTES**

**CAPÍTULO 5: CONDUCTAS INDEBIDAS**

- Disposición derogatoria

## **CAPÍTULO 1: ÁMBITO DE APLICACIÓN**

### **Artigo 1: As competicións deportivas externas**

Para os efectos deste regulamento teñen a consideración de competicións deportivas externas as competicións e probas deportivas nas que participe a Universidade de Vigo xunto con outras entidades, ben sexan de carácter federado, interuniversitario ou de calquera outra índole.

### **Artigo 2: As persoas participantes**

Para os efectos deste regulamento teñen a consideración de persoas participantes todos os deportistas, delegados, adestradores, técnicos e/ou árbitros que representen á Universidade de Vigo nas distintas competicións e probas deportivas externas, ben sexan de carácter federado, interuniversitario ou de calquera outra índole.

## **CAPÍTULO 2: PARTICIPACIÓN NAS COMPETICIÓNNS DEPORTIVAS EXTERNAS**

### **Artigo 3: Asistencia ás competicións**

Correspóndelle á Área de Deportes organizar a participación da Universidade de Vigo nestas competicións e atender as propostas que puideran realizar as persoas pertencentes á comunidade universitaria

### **Artigo 4: Disponibilidade orzamentaria**

Non obstante o dito no artigo anterior, a participación da Universidade de Vigo nas competicións deportivas universitarias externas estará sometida aos acordos da Comisión de Extensión Universitaria sobre a conveniencia da asistencia á estas en base a criterios económicos e/ou de disponibilidade orzamentaria.

A Comisión de Extensión Universitaria poderá aprobar anualmente un teito máximo de gasto para cada un dos programas de participación en competicións deportivas externas (universitarias, federadas, etc) así como un custe máximo por deportista e día de competición que sirva para determinar a asistencia ou non a cada unha das competicións deportivas oficialmente convocadas.

### **Artigo 5: Condición e requisitos xerais esixidos ás persoas participantes**

5.1 As persoas aspirantes a representar á Universidade de Vigo haberán de cumprir todos os requisitos establecidos neste regulamento e na normativa que o desenvolva.

5.2 Será necesario ter a condición de estudante, PDI ou PAS da Universidade de Vigo segundo os termos recollidos ao respecto nos Estatutos da Universidade de Vigo e na normativa de desenvolvemento destes. Non obstante, a Área de Deportes terá en consideración tamén as posibles restricións establecidas a maiores pola normativa específica de cada unha das competicións.

5.3 Excepcionalmente, por causa xustificada e sempre e cando a normativa da propia competición de que se trate o permita, poderá ser autorizada a participación de persoas non pertencentes á comunidade universitaria da Universidade de Vigo.

## **Artigo 6: Criterios específicos de selección de deportistas por modalidade e competición deportiva**

6.1 A Área de Deportes elaborará uns criterios de selección de deportistas para cada competición e modalidade deportiva nos que se establecerán os requisitos mínimos que deben cumprir as persoas aspirantes así como as normas aplicables para establecer unha orde de prelación entre elas, no caso de ser necesario.

6.2 Estes requisitos e criterios serán aprobados pola Comisión de Extensión Universitaria, revisaranse anualmente e serán publicados na páxina web do Servizo de Deportes.

6.3 Para establecer estes criterios, a Área de Deportes nomeará unha persoa responsable por modalidade deportiva entre os técnicos dos clubs e/ou as federacións deportivas do contorno.

6.4 No caso de non existir aínda criterios de selección específicos para algunha competición ou modalidade deportiva, o persoal técnico da Área de Deportes levará a cabo a selección, debendo recorrer ao asesoramento de técnicos deportivos especialistas na modalidade de que se trate.

## **Artigo 7: Aplicación e verificación dos requisitos e criterios establecidos**

A aplicación e verificación dos criterios e requisitos correspondentes a cada modalidade deportiva corresponderá ao responsable técnico nomeado pola Área de Deportes en cada unha delas.

Estas persoas tamén serán as responsables da dirección das probas de selección ou das competicións clasificatorias das súas modalidades deportivas, no caso de habelas.

## **Artigo 8: Obrigatoriedade de participación nas competicións internas**

No caso de competicións interuniversitarias, será condición necesaria para que unha persoa sexa seleccionada o ter participado nas fases previas da competición e modalidade deportiva da que se trate (campionatos internos, galegos,...). Cando, por causa xustificada, unha persoa non participara nestes campionatos, poderá ser igualmente seleccionada sempre que cumpra co resto de requisitos establecidos nos criterios de selección da súa modalidade deportiva e quedaran aínda prazas vacantes para que poida ser seleccionada.

Calquera excepción a esta regra deberá ir fundamentada nun informe técnico motivado por parte do persoal da Área de Deportes.

## **Artigo 9: Renuncias ou non cumprimento dos requisitos de inscrición**

No caso de renuncia ou de non cumprimento dos requisitos de inscrición na data establecida pola Área de Deportes, as persoas seleccionadas perderán o seu dereito a participar na competición da que se trate.

## **Artigo 10: Comisión de Participación en Competicións Externas**

Para garantir a correcta aplicación do presente regulamento, a Comisión de Extensión Universitaria nomeará unha Comisión de **Participación en Competicións Externas** integrada polas seguintes persoas:

O/A vicerreitor/a de Extensión Universitaria ou persoa en quen delegue.

O/A responsable da Área de Deportes ou persoa en quen delegue.

1 Técnico/a en Actividades Deportivas da Área de Deportes.

As 2 persoas representantes da Comisión de Extensión Universitaria designadas para a avaliación das Bolsas Deportivas.

## **CAPÍTULO 3: COMPROMISOS DA ÁREA DE DEPORTES**

### **Artigo 11: Publicidade.**

É obriga da Área de Deportes divulgar debidamente e coa suficiente antelación a existencia de todas e cada unha das competicións deportivas nas que sexa posible a libre concorrencia das persoas pertencentes á comunidade universitaria.

Tamén fará públicos os prazos, criterios e méritos ou probas de selección que serán considerados para seleccionar os/as deportistas que representarán á Universidade de Vigo nas distintas competicións.

### **Artigo 12: Igualdade de oportunidades.**

O persoal técnico da Área de Deportes velará por garantir a igualdade de oportunidades entre as persoas pertencentes á comunidade universitaria, prestando atención a que non se produzan distincións por razón de xénero, modalidade deportiva ou campus, entre outras causas.

### **Artigo 13: Instalacións deportivas**

Para favorecer o bo rendemento nas competicións, os deportistas seleccionados poderán contar cos horarios de adestramento que se estimen necesarios, sempre que a dispoñibilidade das instalacións deportivas así o permita.

### **Artigo 14: Adestramentos e apoio técnico - deportivo**

Naqueles casos nos que se considere oportuno, a Área de Deportes proporcionará aos deportistas seleccionados a asistencia dun adestrador/a responsable tanto do traballo de preparación para a competición como da participación e desenvolvemento na mesma. A

asistencia aos adestramentos aos que sexan convocadas as persoas deportistas será obrigatoria, agás causa debidamente xustificada.

### **Artigo 15: Material e roupa deportiva.**

Proporcionarase o material deportivo necesario para unha axeitada participación así como a roupa deportiva oficial a aquelas persoas que sexan seleccionadas para representar á Universidade nunha competición externa de carácter oficial. A Área de Deportes publicará anualmente a relación de material e roupa deportiva que lle corresponde ás persoas que representen á Universidade de Vigo nas competicións externas.

### **Artigo 16: Desprazamento e aloxamento para a disputa das competicións oficiais de carácter universitario.**

A Universidade de Vigo farase cargo da organización do desprazamento e aloxamento para a disputa das competicións deportivas universitarias externas de carácter oficial que se celebren fóra da localidade de estudos ou traballo da persoa participante.

### **Artigo 17: Xefes de Expedición.**

Naqueles casos nos que se considere oportuno, a Área de Deportes nomeará un xefe de expedición que actuará durante o desenvolvemento da competición da que se trate como representante da Universidade e será o responsable último das decisións que se deban tomar.

### **Artigo 18: Seguro de Asistencia**

Todas as persoas deportistas que a Universidade de Vigo desprace a calquera competición deportiva de carácter externo disporán dun Seguro de Asistencia que inclúa a cobertura dos accidentes deportivas e a posible responsabilidade civil.

### **Artigo 19: Recoñecemento académico pola participación en competicións deportivas**

O alumnado que represente á Universidade de Vigo en competicións deportivas oficiais poderá solicitar o recoñecemento de créditos académicos en función do establecido ao respecto polos órganos competentes da Universidade de Vigo.

En todo caso, o alumnado deberá cumprir cos requisitos e obrigas establecidas neste regulamento e noutras normativas da Universidade de Vigo que lle puideran ser de aplicación.

### **Artigo 20: Almacenamento e Protección dos datos de carácter persoal**

A Universidade de Vigo almacenará os datos de carácter persoal facilitados polas persoas inscritas nunha base de datos da súa propiedade, unicamente para a xestión das actividades

propias da participación da Universidade nas competicións externas e de acordo co previsto no artigo 20 da Lei Orgánica 15/1999, do 13 de decembre, de Protección de Datos de Carácter Persoal. Estes datos non serán cedidos a terceiros e as persoas usuarias poderán executar os seus dereitos de oposición, acceso, rectificación ou cancelación dirixíndose á dirección de correo electrónico deportes@uvigo.es.

## **CAPÍTULO 4: OBRIGAS DAS PERSOAS PARTICIPANTES**

### **Artigo 21: Inscripcións e compromiso de participación**

1.- As persoas que teñan intención de participar deberán cumprimentar o formulario de inscrición dentro do prazo establecido pola Área de Deportes para cada competición, responsabilizándose da veracidade dos datos aportados.

2.- No caso concreto dos PDI e dos PAS, e sempre que o campionato coincida co seu horario laboral, estes deberán achegar ademais unha “Solicitud de Permiso” asinada polo responsable da súa unidade conforme a súa ausencia non afectará negativamente ao servizo.

3.- Os deportistas finalmente seleccionados deberán confirmar por escrito dentro do prazo establecido pola Área de Deportes que aceptan ser inscritos na competición e comprométese a participar na mesma.

4.- A través da súa inscrición, as persoas participantes comprométese tamén a ceder á Área de Deportes os dereitos de imaxe derivados da súa participación na competición deportiva para a que foran seleccionados.

### **Artigo 22 Delegados/as nas modalidades deportivas de participación colectiva**

1.- Nas modalidades deportivas de participación colectiva, as persoas que adquiran o dereito a representar á Universidade de Vigo deberán elixir a unha persoa delegada que actuará como interlocutora coa Área de Deportes.

### **Artigo 23 Xefes de Expedición**

1.- Ao remate da competición, os/as xefes de expedición deberán informar por escrito á Área de Deportes, nun modelo que se lle facilitará a tal efecto, sobre as incidencias que tiveran lugar.

### **Artigo 24: Uso da indumentaria oficial**

1.- Todas as persoas participantes (xogadores, adestradores, delegados,...) deberán usar a roupa oficial da Universidade de Vigo entregada a tal efecto durante as viaxes de ida e de regreso así como durante a participación nas competicións. Estas prendas deberán vestirse correctamente, gardando o decoro que corresponde á institución universitaria que representan.

2.- Non estará autorizado o uso da roupa oficial da Universidade de Vigo en lugares ou situacións alleas ao contexto deportivo (saídas nocturnas, festas,...) agás autorización expresa da Área de Deportes.

## **Artigo 25: Comportamento durante a competición**

1.- Será obrigatorio competir con deportividade, respectando ao rival e o sentido deportivo da competición.

2.- As persoas participantes serán puntuais e manterán un estrito cumprimento dos horarios establecidos pola Área de Deportes.

3.- Será obrigatoria a asistencia das persoas participantes aos actos oficiais aos que sexan convocados pola organización (acto de apertura, recepcións, entrega de trofeos,...), agás autorización expresa da Área de Deportes.

4.- Estarán prohibidas as actuacións que impliquen condutas consideradas non apropiadas como poidan ser fumar en lugares onde non estea permitido, o consumo irresponsable de bebidas alcohólicas, non respectar os horarios de descanso do resto de participantes, alterar o normal funcionamento do lugar de concentración ou incumplir as instrucións ditadas pola Área de Deportes.

## **Artigo 26 Responsabilidade sobre o material**

1.- As persoas participantes serán as responsables da roupa e material deportivo que a Área de Deportes lles entregue, debendo asinar un documento de recepción do mesmo.

2.- A roupa e material deportivo en calidade de empréstamo deberá ser devolto nun prazo máximo de 7 días dende a finalización da competición momento no cal asinarase un documento de entrega do mesmo. No caso dos deportes colectivos, a responsabilidade sobre todo o material entregado a un equipo recaerá na persoa nomeada como Delegada deste. No caso de que falte algunha peza da indumentaria ou do material a devolver, a persoa delegada será a responsable en primeira instancia do seu reintegro, salvo que lle comunique á Área de Deportes todos os datos do posuidor ou posuidores da/-s prenda/-s pendentes de entrega.

2.- No caso de non ser devolto parte do material ou da roupa emprestada, a Área de Deportes, logo da comunicación e notificación da sanción polo Comité de Participación en Competicións Externas, resérvase o dereito a emprender as accións necesarias para conseguir a devolución íntegra do material prestado ou, no seu defecto, o valor económico equivalente.

## **Artigo 27: Normas de Disciplina Deportiva propias de cada competición.**

Todas as persoas que formen parte das seleccións universitarias deberán cumprir as esixencias recollidas nas Normas de Disciplina Deportiva propias da competición na que se vaia a participar. O incumprimento destas normas poderá levar aparellada a toma de medidas por parte da Área de Deportes a maiores da imposta polo Comité Organizador.



## **CAPÍTULO 5: CONDUTAS INDEBIDAS**

### **Artigo 28: Condutas indebidas de carácter moi grave**

- 1.- Non asistir, sen causa xustificada, a un campionato ou proba para a que a persoa fora seleccionada e inscrita cando a comunicación desta non asistencia sexa menor de 7 días respecto do inicio da competición.
- 2.- Non comparecer, sen causa xustificada, a unha proba ou encontro durante a celebración dun evento ou campionato.
- 3.- Adoitar unha actitude pasiva, non competitiva ou irrespectuosa cos contrarios, os xuíces, os organizadores ou cos seus propios compañeiros durante a celebración dun encontro ou proba deportiva.
- 4.- Agredir, intentar agredir ou ameazar a outro participante na competición deportiva, a un espectador ou a calquera outra persoa que forme parte da organización do evento.
- 5.- Incumprir os compromisos ou faltar a veracidade dos datos proporcionados á Área de Deportes no momento da inscrición.

### **Artigo 29 Condutas indebidas de carácter grave**

- 1.- Non asistir, sen causa xustificada, a un campionato ou proba para a que a persoa fora seleccionada e inscrita cando a comunicación desta non asistencia se realice entre 7 e 14 días respecto do inicio da competición.
- 2.- Non asistir a algún acto oficial convocado pola organización da competición (acto de apertura, recepcións, entrega de trofeos,...) cando as persoas participantes foran informadas previamente da súa convocatoria ao mesmo.
- 3.- Non devolver, total ou parcialmente, e sen causa debidamente xustificada a roupa ou o material que lle fora entregado en calidade de empréstamo.
- 4.- O consumo irresponsable de bebidas alcohólicas ou fumar en lugares inadecuados, non respectar os horarios de descanso do resto de participantes, alterar o normal funcionamento do lugar de concentración ou incumprir as instrucións ditadas pola Área de Deportes.
- 5.- Adoitar actitudes ou ter comportamentos que poidan ser considerados como non apropiados ou supoñer prexuízos graves para a imaxe da Universidade de Vigo.

### **Artigo 30 Condutas indebidas de carácter leve**

- 1.- Non asistir, sen causa xustificada, a un campionato ou proba para a que a persoa fora seleccionada e inscrita cando a comunicación desta non asistencia sexa maior de 14 días respecto do inicio da competición.

2.- Non informar ao Servizo de Deportes das incidencias ocorridas durante o desenvolvemento da competición.

3.- Ser expulsado ou excluído da competición por mor de condutas antideportivas sempre e cando non sexan consideradas como faltas de maior gravidade.

4.- Adoitar actitudes ou ter comportamentos que poidan ser considerados como non apropiados ou supoñer prexuízos graves para a imaxe da Universidade de Vigo sempre e cando non sexan consideradas como faltas de maior gravidade.

5.- Facer un uso inadecuado da indumentaria oficial.

## **Artigo 31 Medidas ou consecuencias das condutas indebidas**

Para as condutas indebidas de carácter moi grave:

Perda do dereito a participar en actividades organizadas pola Área de Deportes, facer uso das instalacións deportivas universitarias e/ou representar á Universidade de Vigo en competicións externas, durante un período de 1 a 3 anos, sen prexuízo daquelas outras que lle poidan corresponder en aplicación do Regulamento de Disciplina Académica legalmente vixente.

Para as condutas indebidas de carácter grave:

Perda do dereito a participar en actividades organizadas pola Área de Deportes, facer uso das instalacións deportivas universitarias e/ou representar á Universidade de Vigo en competicións externas, durante un período de 6 meses a 1 ano, sen prexuízo daquelas outras que lle poidan corresponder en aplicación do Regulamento de Disciplina Académica legalmente vixente.

Para as condutas indebidas de carácter leve:

Perda do dereito a participar en actividades organizadas pola Área de Deportes, facer uso das instalacións deportivas universitarias e/ou representar á Universidade de Vigo en competicións externas, durante un período de ata 6 meses, sen prexuízo daquelas outras que lle poidan corresponder en aplicación do Regulamento de Disciplina Académica legalmente vixente.

## **Artigo 32 Medidas ou consecuencias das condutas indebidas**

Para o establecemento das medidas ou consecuencias que correspondan ás condutas indebidas será preciso a tramitación dun expediente ao efecto, con audiencia á persoa interesada, que será resolto polo Reitor ou persoa en quen delegue.

### ***Disposición derogatoria***

*1.- O presente Regulamento derroga o Regulamento de Selección de Deportistas e o Regulamento de Disciplinario sobre Participación en Competicións Externas aprobado en Consello de Goberno o 23 de xaneiro de 2007.*

